

四庫全書

子部

欽定四庫全書

續名醫類案卷五十二

錢塘魏之琇撰

肺

薛立齋治一婦人素血虛發熱咳嗽服痰火之劑後吐
膿血面赤脉數其熱甚危此膿成而氣血虛也用八
珍湯補元氣桔梗湯治之而愈

一婦人感冒風寒或用發表之劑反咳嗽喘急飲食少

思胸膈不利大便不通右寸關浮數欲用疎通之劑
薛曰此因脾土虧損不能生肺金若更利之復耗津
液必患肺癰矣不信仍利之虛症悉至後果吐膿乃
朝用補中益氣湯夕用桔梗湯各數劑吐膿漸止又
朝仍用前湯夕用十全大補湯各五十劑喜其善調
理獲愈

一婦人咳嗽吐痰胸膈作痛右寸關浮滑項下牽強此
脾胃積熱之痰非癰患也以二陳山梔白朮桔梗治

之安

一婦人素血虛內熱時咳甲辰孟冬兩尺浮洪以脾不健請治曰防患肺症丙午孟春果咳嗽左右寸脉洪數肺癰也膿已成右寸脉仍洪數乃心火尅肺金夏令可憂用壯水健脾之劑稍愈彼遽自忽不事調攝果歿于夏令

喻嘉言治施眉蒼肺痿喘嗽吐清痰肢體軟痿不能舉動脈來虛數以蛤蚧二十枚酒浸酥炙人參黑參各

十兩蜜丸時時噲化不終劑而痊

出張氏
醫通

張露玉治陸去非肺痿聲颯吐痰午後發熱自汗左脉
弦細右脉虛濡平昔勞心耽色所致先與生脉散合
保元湯次與異功散加黃芪並姜棗與都氣丸晨夕
間進調補半月熱除痰止月餘方得聲清

孫起伯肺脹服耗氣藥過多脉浮大而重按豁然飲食

不入幸得溺清便堅

金土
未德

與局方七氣丸每劑用人

參三錢肉桂半夏麩炙甘草各一錢生薑四片四劑

霍然蓋肺脹實症居多此脉虛大不當以尋常論也
一尼肺脹喘鳴肩息服下氣止嗽藥不應漸至胸腹脹
滿脉得氣口弦細而瀋此必勞力氣上誤飲冷水傷
肺肺氣不能收飲所致也遂與越脾湯減麻黃加細
辛葶藶大瀉肺氣而安

一酒客嚴冬醉卧渴飲冷茶肺脹喘咳脉得氣口沉緊
搏指與小青龍去白芍加葶藶半夏一劑而痊則知
肺脹喘滿當以葶藶為向导也非實症未可輕投

孫丈垣治初陽姪婦先時咳嗽諸治無功嗽急則吐用
碧玉散二錢白湯調下立止半年復咳嗽胸背隱隱
疼痛常內熱吐出桃紅膿甚多且腥穢右脇并乳脹
痛診之脉洪數大便燥肌瘦骨立此肺癰症也用貝
母茜根白芍各一錢知母麥冬山梔紫莞各八分桑
皮當歸丹皮杏仁各七分苡仁一錢五分甘草葶藶
各五分服之甚安但稍停即發或云脉竅中痰積瘀
血尚多未能即去宜緩圖之俟膿盡當愈孫謂丹溪

雖有此言亦不可執設不以藥消化之必俟其自己
恐歲月深而有他變且中年之人何能當此莫若清
熱潤肺消痰化痰久服或早愈也或又謂久嗽傷肺
宜補每補必增熱加痛加咳而膿轉多仍以依法治
之二年良愈

喻嘉言治陸令儀母平日持齋腸胃素槁天癸已絕復
淋瀝不止治之久痊值秋月燥金太過濕蟲不生人
多病咳而血虛津槁之軀受傷獨猛胸脇緊脹上氣

喘卧寐不寧咳動則大痛痰中帶血而腥食不易入
聲不易出寒熱交作申酉二時燥金用事諸苦倍增
脉時大時小時牢伏時弦緊服清肺藥進退告以肺
癰將成高年難任以葶蘆大棗瀉肺湯先通肺氣之
壅即覺氣稍平食少入痰稍易出身稍可側大有生
機乃曰未也因見來勢太急不得已取快一時暫開
者易至復閉迨復閉則前法不可再用矣今乘其暫開多方
以圖必在六十日後交立冬節方是愈期蓋身中之

燥與時令之燥膠結不解必俟燥金退氣肺金乃寧
後六十日間屢危屢安大率皆用活法斡旋緣肺病
不可補而脾虛又不能生肺肺燥喜潤而脾滯又艱
于運食今日脾虛不思飲食則于清肺中少加參朮
以補脾明日肺燥熱盛咳嗽則于清肺中少加阿膠
以潤燥日復一日扶至立冬之午刻病者忽自云內
中光景大覺清爽可得生矣奇哉天時之燥去而肺
金之燥遂下傳大腸五六不一大便畧一潤腸旋即

解散正以客邪易去耳至小雪節康健加餐倍于曩昔蓋胃中穴虛已久勢必復其容受之常方為全愈也

薛立齋治一男子神勞冬月患咳嗽服解散之劑自以為便曰此因肺氣虛弱腠理不密而外邪所感也當急補其母是治本也始服六君子湯內去參朮反加紫蘇枳殼之類以致元氣益虛生肺癰而歿

一武職因飲食起居失宜咳嗽吐痰用化痰止咳之藥時仲夏左尺洪數而無力胸滿面赤吐痰腥臭自汗

曰腎虛水泛為痰而反重亡津液得非肺癰乎不信
仍服前藥翌日吐膿脉數右寸為甚用桔梗湯一劑
數脉與膿頓減又二劑將愈佐以六味丸而痊

一男子咳嗽喘急發熱煩躁面赤咽痛脉洪大用黃連
解毒湯二劑少退更以梔子湯四劑而安

此肺癰將成未成之候

一男子患肺痿咳嗽喘急吐痰腥臭胸滿咽乾脉洪數
用人參平肺散六劑及飲童便諸症悉退更以紫菀
茸湯而愈童便雖云治虛火常治瘡瘍焮腫疼痛發

熱作渴及肺痿肺癰發熱口渴者尤效

一僕年逾三十嗽久不愈

病久故可用瀋

氣壅不利睡卧不寧

咯吐膿血甚虛可畏其主已棄之矣與寧肺散一服

少愈又服而止大半乃以寧肺散湯數劑而痊所謂

有是病必用是藥若疑前散性瀋而不用何以得愈

上舍毛體仁素陰虛春初咳嗽胸中隱痛腎脉洪數肺

脉數而時不見曰內當結癰先用六味地黄丸料一

劑服之翌日來謂曰昨得良劑嗽愈六七務求一方

到監調理曰陰火炎患癰之症第因元氣虛弱未能
發出因其易忽薛不能乃別用降火化痰等劑愈甚
月餘復請診之脉洪滑而數曰膿已成矣當請常治
之者同議針之且免內潰之患仍不決又月餘請視
他醫已先開瘡孔偏上兜膿不出仍內潰脉愈洪大
曰脉洪滑而數其舌青黯內臟已壞無能為矣後果然
一男子咳嗽兩脇脹滿咽乾口燥咳唾腥臭以桔梗湯
四劑而唾膿以排膿散數服而止乃以補陰排膿之

痢而瘳

一男子咳而膿不止脉不退諸藥不應甚危用柘黃丸

一服少愈再服頓退數服而痊柘黃一兩為末百齒

霜即梳二錢用糊為丸如梧子大每服三五丸米飲

下柘黃乃柘樹所生者其色黃狀靈芝江南最多北

方鮮有

一婦人吐膿五心煩熱口渴胸悶以四順散三劑少止

以排膿散數服而安排膿散黃芪白芷五味人參四

順散貝母紫苑桔梗各一錢半甘草七分作一劑水煎食遠服

一男子因勞咳嗽不止項強而痛脉微緊而數此肺癰也尚未成膿欲用托裡益氣藥彼不信仍服發散藥致血氣愈虛吐膿不止竟不救經云肺內主氣外司皮毛若肺氣虛則腠理不密皮毛不澤肺受傷則皮毛錯縱故患癰痿腸癰者必致皮毛如此以其氣不能榮養而然也亦有服表藥見邪不解仍又發表殊

不知邪不解者非邪不能解多因腠理不密而邪復入也專用發表則腠理愈虛邪愈易入反為散症矣宜診其脉邪在表者止當和解而實腠理乘虛復入者亦當和解兼實腠理故用托裡益氣之藥若小便赤色為肺熱所傳短少為肺氣虛蓋肺為母腎為子母虛不能生子故也亦有小便頻者亦為肺虛不能約制耳

一男子面白神勞咳而胸臆隱痛其脉滑數以為肺癰

欲用桔梗湯不信仍服毒藥致咳嗽愈甚吐痰腥臭
始悟乃服前湯四劑咳嗽少定又以四順散四劑而
脉靜更以托裡藥數劑而愈大抵勞傷血氣則腠理
不密風邪乘肺風熱相搏蘊結不散必致喘咳若誤
汗下過度則津液重亡遂成斯症若寸脉數而虛者
為肺痿數而實者為肺疽脉微緊而數者未有膿也
緊甚而數者已有膿也唾膿自止脉短而面白者易
治膿不止脉洪大而面赤色者不治使其治早可救

膿成則無及矣金匱方論熱在上焦者因咳為肺痿
得之或從汗出或從嘔吐或從消渴小便利數或從
便難又被下藥快利重亡津液故寸口脉數其人燥
咳胸中隱隱時痛脉反滑類此為肺癰咳吐膿血脉
數虛者為肺痿數實者為肺癰

一童子氣稟不足患肺癰吐膿腥臭皮毛枯槁脉浮按
之濡更無力用鍾乳粉湯治之一男子患之形症皆
同唯咽喉時或作痒痰多脇痛難于睡卧用紫菀茸

湯治之而病愈

一 弱人咳膿日晡發熱夜間盜汗脉浮數而緊用人參五味子湯數劑頓退以紫菀葶湯月餘而痊

一 男子患肺痿咳嗽喘急吐痰腥臭胸滿咽乾脉洪數用人參平肺散六劑及飲童便諸症悉退更以紫菀葶湯而愈童便雖云專治虛火常治瘡瘍腫焮疼痛發熱作渴及肺痿肺癰發熱口渴者尤效

一 婦人患肺痿咳嗽吐痰腥臭日晡發熱脉數無力用

地骨皮散治之熱止更用人參養肺湯月餘而安

一男年前病肺癰後又患咳嗽頭眩吐沫飲食少思小便頻數服解散化痰藥不應診之脾肺二脉虛甚謂眩暈唾涎屬脾氣不能上升小便無度乃肺氣不得下降尚未成癰耳投以加味理中湯四劑諸症已退大半更用鍾乳粉湯而安河間曰金匱云肺痿屬熱如咳又肺癰聲啞聲嘶咯血此屬陰虛熱甚然也本論治肺痿吐涎沫而不咳者其人不渴必遺尿小便

數以上虛不能制下故也此為肺中冷必眩多涎唾
用炙草乾薑此屬寒也脉痿涎唾多心中血液溫液
者用炙甘草湯此補虛勞也亦與補陰虛火熱不同
是皆宜分治故肺痿又有寒熱之異也

趙以德治一婦人年二十餘患肺癰胸膈間患一竅于
口中所咳膿血與竅相應而出必人參黃當歸補氣
血劑加退熱排膿等藥服之不一月而安

藥要
或問

治肺癰目擊神效其法用百年芥菜鹵久窖地中者數

是立起此鹵嘉興府城中大家多藏之

廣筆記

廣筆記魚腥草不住口食之治肺癰吐膿血神方也正名葳草兼治魚口

薛立齋治陸司廳子仁春間咳嗽唾痰腥穢胸滿氣促皮膚項強脉數此肺疽也蓋肺系在項肺傷則系傷故牽引不能轉側肺者氣之本其華在毛其充在皮膚傷不能攝氣故脇脹氣促而皮膚縱東垣云肺瘡之脉微緊而數者未有膿也緊甚而數者已有膿也

其脉來緊數則膿已成遂以人參黃芪當歸川芎白芷貝母知母麥冬萸仁桔梗防風甘草蕪以蟻礬丸及太乙膏治之膿盡脉濇而愈至冬脉復數經云飲食勞倦則傷脾脾傷不能生肺金形寒飲冷則傷肺肺傷不能生腎水腎水不足則心火熾盛故脉來洪數經云冬見心脉而不治果歿于火旺之月

凡肺疽愈而復作多

不治余常治三人一間三年兩間一年皆復作而歿

周國用年逾三十患咳嗽項強氣促右寸脉數此肺疽

也東垣云風中于胃呼氣不入熱攻于榮吸氣不出
風傷皮毛熱傷血脉風熱相搏血氣稽留於肺變成
瘡疽診其寸脉數而虛者脉痿也數而實者肺疽也
今診脉滑此疽膿已成以排膿托裡之藥及螻蛄丸
治之脉漸濇而愈錦衣李天器亦患此吐膿面赤脉
大謂肺病脉宜濇面宜白今脉大面赤火尅金也不
可治果歿

一男子年逾四十喘咳脇痛胸滿氣促右寸脉大此風

熱蘊于肺也尚未成瘡屬有餘之症意欲以瀉白散
治之彼謂肺氣素怯不然之乃服補藥喘咳愈甚兩
月後復請視之汗出如油喘而不休此肺氣已絕安
用治後果歿夫肺氣充實邪何從襲邪氣既入則宜
去之故用瀉白散所以瀉肺中之邪氣也邪氣既去
則真氣自實矣

姚應鳳治某叟患脹滿諸醫多云膈症應鳳曰此肺癰
耳令病者閉目取一大盃水向病者頂上傾之病者

陡大驚亟舉刀直刺心坎瀉膿血數椀而愈人問之
應鳳曰心尖下垂水瀦而驚驚則心系提吾刀可入

也

仁和縣志

沈夫人患嗽血晝夜不休應鳳曰脉慮痿不慮潰至第
二葉尚可生也先投洗肺湯已令食猪肺數十斤遂

愈

同上

腹癰

薛立齋治上舍周一元腹患癰三月不愈膿水清稀朝

寒暮熱服四物知柏之類食少作瀉痰涎上涌服二
陳枳實之類痰涎愈甚胸膈痞悶問故曰朝寒暮熱
血氣虛也食少作瀉脾腎虛也悉因真氣虛而邪氣
實也當先壯其胃氣使諸臟有所稟而邪自退矣遂
用六君加黃芪當歸數劑諸症漸退又用十全大補
湯肌肉漸斂更用補中益氣湯調理而痊

從姪孫年十四而畢姻乙巳春年二十四腹中作痛用
大黃等藥二劑下血甚多胸腹脹滿痰喘發熱又服

破氣降火藥一劑汗出如水手足如水薛歸診之左
關洪數右關尤甚乃腹癰也雖能收斂至夏必變而
成瘰症用參芪各一兩歸朮各五錢陳皮茯苓各三
錢炙草炮薑各一錢二劑諸症稍退腹始微赤按之
覺痛又二劑作痛又二劑腫痛脉滑數針出膿瘰更
用大補湯精神飲食如故因遺精患處色黯用前藥
加五味山萸山藥骨脂吳茱萸等劑瘡口漸斂瘰症悉
具其脉非洪大而數即微細如無惟專服獨參湯人

乳汁少復良久仍脫曰當備後事以俟火旺乃禱鬼神巫者歷言往事如見更示以方藥皆峻利之劑且言保其必生敬信服之後果歿經曰拘于鬼神者不可與言至德而况又輕信方藥于邪妄之人耶書此以警後患

一男子腹患癰腫硬不潰乃陽氣虛弱嘔吐少食乃胃氣虛寒法當溫補脾胃假如腫赤痛甚煩躁脉實而嘔為有餘當下之潰腫硬不潰脉弱而嘔為不足當

補之若痛傷胃氣或感寒邪穢氣而嘔者雖腫瘍猶當助胃壯氣彼不信仍服攻伐藥而嘔愈甚復請治脉微弱而發熱曰熱而脉反靜脱血脉反實汗後脉反躁者皆為逆也辭不治果歿

秋官錢可客腹患癰焮腫作痛煩渴飲冷大便不通脉沉數實此熱毒蘊于內用清熱消毒散加大黃二錢一劑諸症悉退但形氣頓虛用托裡消毒散去銀花白芷倍加參芪歸朮而安

毛礪安側室壯患癱月餘矣色黯不腫內痛作嘔飲食不入四肢逆冷其脉或脫絕或浮大雜用定痛敗毒之藥曰此氣血俱虛而作痛內決無膿不治之症也強用大溫補之藥二劑痛止色赤飲食少進謂但可延日而已人皆以為有膿復強針之又用大補之劑始生清膿少許衆仍以為毒結于內用攻膿保其必生殊不知乃速其死耳惜哉

一男子腹患癰腫硬木悶煩熱便秘脉數而實以黃連

內疎湯一劑少愈以黃連解毒湯二劑頓退更以金銀花散四劑瘡頭出水而消

一男年逾三十腹患癰腫脉數喜冷齊氏云瘡瘍腫起堅硬瘡疽之實也河間云腫硬木悶脈數飲冷邪氣在內也遂用清涼飲倍用大黃三劑稍緩次以四物湯加芩連山梔木通四劑而遂潰更以十宣散去參芪肉桂加金銀花天花粉漸愈彼欲速效自服溫補藥遂致肚腹俱腫小便不利仍以清涼飲治之膿潰

數椀再以托裡藥治之愈東垣云瘡疽之發其受有
內外之別治之有寒溫之異受之外者法當托裡以
泄劑反用寒藥則是皮毛始受之邪引入骨髓受之
內者法當疎利以寒劑反用溫補托裡則是骨髓之
病上徹皮毛表裡通潰共為一瘡助邪為毒苦楚百
倍輕則幾殆重則死矣

一兒子素好酒色小腹患毒脉弱微痛欲求內消謂當
助胃壯氣兼行經活血藥佐之可消不宜用敗毒等

藥彼欲速效自用之病熱果盛瘡亦不潰飲食少思
迨兩月餘復請治診其脉愈弱盜汗不止聚腫不潰
肌寒肉冷自汗色脫此氣血俱虛也故不能發腫成
膿以十全大補湯三十餘劑遂成膿刺之反加煩躁
脉此亡陽也以聖愈湯二劑仍以前藥百貼而愈

劉貴患腹癰焮痛煩躁作嘔脉實河間云瘡瘍者火之
屬須分內外以治其本若脉沉實者先當疎其內以
絕其源又云嘔噦以煩脉沉而實腫硬木悶或皮肉

不變邪氣在內宜用疎黃連湯治之然作嘔脉實毒在內也遂以前湯通利二三日諸症悉去更以連翹消毒散而愈

一人患腹癰膿熟開遲脉微細膿出後瘡口微膿如蠟吐沫此內潰透膜也凡透瘍透膜十無一生雖以大補藥治之亦不能救此可為待膿自出之戒也

黃師文云男子服建中湯婦人服四物湯往往十七八得但時為之損益耳有男病小腹一大癰其諸弟侮

之曰今日用建中湯否師文云服建中湯俄而癰潰
蓋小腹癰本虛其熱毒乘虛而入建中湯既補虛而

黃芪且潰膿也

北窗
灸

腰疽

薛立齋治府庠彭碧溪患腰疽服寒涼敗毒之藥色黯
不痛瘡頭如鋪黍背重不能安寢耳聾目白面色無
神小便頻瀆作渴迷悶氣粗短促脉浮數重按如無
先用滋水之藥一劑少頃便利渴止背即輕爽乃砭

出瘀血以艾半斤許明灸患處外敷烏金膏內服參
芪歸朮肉桂等藥至數劑元氣稍復自疑肉桂辛熱
一日不用手足並冷大便不禁仍用肉桂及補脂二
錢肉豆蔻一錢大便復常其肉漸潰更用當歸膏以
生肌肉八珍湯以補氣血而愈

錦衣傅允承母年踰七十腰生一瘰作痒異常脉浮數
反惡寒曰此瘡疽症也未潰而先弱何以收斂况大
便不通則真氣已竭治之無功因懇請不得已用六

君加藿香神曲數劑飲食漸進大便始通更用峻補之劑潰而膿清作渴再用參芪歸地麥冬五味渴止彼喜曰可無虞矣曰尚難收斂先日之言也彼疑遂速他醫卒致不起

舉人顧東溪久作渴六月初腰患疽不靜起居瘡潰尺許色黯敗臭小便如淋唇裂口刺七月終請治左尺洪數左關浮瀋謂先渴而患疽者乃腎水乾涸虛火上炎多致不起今膿水敗臭色黯不痛瘡口張大乃

脾氣敗而肌肉死也小便如淋痰壅喘促口乾舌裂
乃脾肺敗而腎水絕也左尺洪數腎無所生也左關
浮瀆肺尅肝也况當金旺之際危殆速矣二日後果
歿蓋此症既發于兩月方歿者乃元氣虛不能收斂
也若預為調補使氣血無虧亦有得生者

一男子腰患毒膿熟不潰針之膿大泄反加煩躁以聖
愈散湯四劑而寧更以人參養榮湯加麥冬五味兩
月而愈此人後患濕氣遂為痼疾凡瘡膿血去多痰

口難合尤當補益務使氣血平復否則更患他症必難治療慎之

一男子腰中患疽發而不潰其氣血止能發起不能培養為膿也投大補藥數劑而潰又數劑膿出尚清乃服參芪歸朮膏斤餘膿少稠數斤膿漸稠肌肉頓生凡大癰疽藉氣血為主若患而不起或潰而不腐或不收斂及膿少或清皆氣血之虛也宜大補之最忌攻伐之劑亦有膿反多者乃氣血而不能禁止也若

潰後發熱作渴脉大而膿愈多屬真氣虛而邪氣實也俱不治常見氣血充實之人患瘡皆腫高色赤易腐潰而膿且稠又易于收斂怯弱之人多不起發不腐潰及難于收斂若不審察而妄投攻劑虛虛之禍不免矣若患後當調養若癰癰流注之症尤當補益也否則更患他症必難措治慎之

有人腰間生一毒癰紅腫未破皮痛不可忍俯躬而行一人取新殺牡猪肚肝切片如瘡大貼上外以布纏


定一對畫其病良已肝色變黑臭不可近棄之地犬
不食下有小指大一點尚硬乃肝小未貼滿所致竟

亦無他

奇疾方張
在五談

薛立齋治崑山張舉人元忠孟秋患腰疽瘡頭如大豆
粒根大三寸許微腫畧赤虛症悉具用桑枝灸患處
服活命飲一劑腫起色赤飲食仍少用香砂六君子
湯四劑食漸進後用大補藥膿雖成而不潰乃每劑
加附子一片二劑後膿自涌出旬日而愈

陸氏女初嫁患腰痛不腫脉沉滑神思倦怠此為內發
七情之火飲食之毒所致以托裡藥一劑下瘀膿升
許陳良甫曰瘡未潰內陷面青唇黑者不治果歿



續名醫類案卷五十二

欽定四庫全書

子部

續名醫類案卷五十三
四

詳校官太醫院吏目臣宋桂

編修臣倉聖脈覆勘

總校官編修臣王燕緒

校對官中書臣劉源溥

謄錄監生臣陳箴

欽定四庫全書

續名醫類案卷五十三

腸癰

錢塘魏之琇撰

華陀傳軍吏李成苦咳嗽晝夜不寤時吐膿血以問陀
陀言君病腸癰咳之所吐非從肺來也與君散兩錢
當吐二升餘膿血訖快自養一月可小起好自將愛
一年便健十八歲當一小發服此散亦行復差若不

得此藥故當死復與兩錢散成得藥去五六歲親中

人有病如成者謂成曰卿今強健我欲死何忍無急

去藥

松之按古語以藏為去

以待不祥先持貸我我差為卿從

華陀更索成與之已故到譙適值見收忽忽不忍從

來求後十八年成病竟發無藥可服以至于死

三國志

薛立齋治金臺院僉憲年逾五十腹內隱痛小便如淋

皮膚錯縱而脉滑數此腸癰也脉滑數則膿已成遂

以廣東牛皮膠酒溶化送太乙膏下膿升許更以排

膿托裡藥及蝟蟻丸而愈

孫文垣治染匠婦腹痛兩年或以為寒為熱為氣為血
為蟲為積治之不效或與膏藥大如斗貼之痛益劇
欲去之牢粘不可揭卧舟中數人扶之不起往診見

其面色蒼黑兩手枯燥如柴六脉皆洪數

腹痛脉洪
數內癱可

知其得此
亦類此

問其痛之所在解衣指示

痛有
定處

始知膏藥

牢粘叩其不能起步之由乃左脚不可動動則痛應
于心察其色脉皆非死候此必腸癰左脚不能舉動

是其徵也

俗名縮脚腸癰

與營衛反魂湯加金銀花為君四

帖酒水各半煎服一帖痛稍減二帖下臭膿半桶病

全減膏藥亦不揭自落四帖完其婦與匠來謝并求

善後之方

龔之才治一婦人腹痛如錐每痛欲死不可著手六脉

洪數此腸癰也用穿山甲炒白芷貝母殭蠶大黃合

一大劑水煎服膿血從小便出而愈

李士材治吳光祿夫人患腹滿而痛喘急異常飲食不

進或用理氣利水之劑二十日不效診之脉大而數
右尺為甚令人按腹手不可近曰此大腸癰也脉數
為膿已成用黃芪角刺白芷之類加葵根一兩煎一
椀頓服之未申痛甚至夜半膿血大下昏暈不支即
與獨參湯消安更與十全大補兩月而愈

周漢卿治義烏陳氏子腹有塊捫之如罌漢卿曰此腸
癰也用大針灼而刺之入三寸許膿隨針迸出有聲

愈

明史

薛立齋診秀水卜封君善飲腹痛便瀉服分利化痰等劑不應其脉滑數皮膚甲錯謂此酒毒致腸癰而潰敗也辭不治仍服煎劑果便膿而歿

孫某治一女子腹痛百方不治脉滑數時作熱腹微急孫曰痛病脉當沉細今滑數腸癰也以雲母膏一兩為丸如梧子大以牛皮膠溶入酒中并水吞之餉時

服盡下膿血愈

外科
心法

薛立齋治通府張廷用患腸癰兩月餘矣時出白膿體

倦惡寒此邪氣去而中氣虛也用托裡散兼益氣湯
徐徐呷之又令以猪肚肺煮爛取其湯調米粉煮時
呷半盞後漸調理而痊

一男子小腹痛而堅硬小便數汗時出脉遲緊以大黃

湯一劑下瘀合許以薏苡仁湯四劑而安

苡仁瓜萸
各三錢丹

皮桃仁
各二錢

一男子膿已成用雲母膏一服下膿升許更以排膿托
裡藥而愈後因不守禁忌以致不救

一人患腸癰偃僕痛不能伸有道人教以飲純黃犬血
二椀和白酒服其人逆飲至四椀次日下膿血盡而

瘰

廣筆記

腸風臟毒

孫文垣治潘大司馬嘗有腸風之症八月丁祭學博餽
鹿血食之血暴下用槐角子五錢黃連枳壳地榆貫
衆各三錢一服而止潘善其方書之粘壁間遇有便
血者依方服之無不立效

陳鹿塘原有腸風臟毒之症大便燥結數日不能一行
痛苦殊甚此胃寒腸熱也其脉兩寸皆數兩關弦而
無力兩尺洪滑而左尤甚久治不效因憶東垣有云
大腸喜清而惡熱脾胃喜溫而惡寒以胃屬土腸屬
金也乃制一方專以腸風臟毒藥為主外以養血之
藥裹之使不傷胃氣蓋藥先入胃後入大腸入胃時
裹藥未化及入大腸則裹藥化而君藥始見庶幾兩
不相妨因以九製大黃二兩槐花三兩木耳二兩郁

李仁皂角子象牙屑條芩各一兩血餘升麻荆芥穗
各五錢共為末煉蜜為丸赤豆大外以四物加蒲黃
各一兩為衣米飲送下空心及下午各二錢血果止
大便不燥飲食日加而愈

王祖泉大便裡急後重腹痛日夜下紫稠粘三四十度
作利治三月不效肌瘦懶食眼合懶開悉以為不治
脉之六部濡弱所下之色甚晦狀如苧苗汁曰此非
痢乃臟毒下血也醫說中人參樗皮散正與此對即

製與之其夜果減半終劑全愈方以人參樗根白皮
各二兩為末空心米飲調二錢忌肉汁生菜魚腥

湯封君簡庵血分熱甚以善飲致腸風且心腎不交以

四物湯加棗仁側柏葉槐花連翹蜜為丸服之而愈

吳孚先治張東銘素患痔疾後重之症似痢非痢登

園窘迫行步如跨馬狀坐亦作楚六脉偏盛稍覺無

神知為氣血虛而挾濕熱用芎歸苓連生地槐角查

肉升麻加人參二兩為丸彼不用參服之不效復入

參服半料已全愈

張子和曰一男子臟毒下血當六月熱不可堪自分必死忽思蜜水猛舍性命飲一大盞痛止血住

汝南節度副使完顏君寶病臟毒下血發渴寒熱往來延及六載日漸瘦弱無力面黃如染張診其兩手脉沉而身涼內經寒以為營氣在故生可治先以七宣丸下五七行次以黃連解毒湯加當歸赤芍地榆散同煎服之一月而愈

方勺泊宅編云外兄劉掾病臟毒下血凡半月自必死得一方只以乾肺燒灰飯服二錢遂愈又王璆百一方云曾通判子病下血十年亦用此方一服而愈

為丸為散皆可

本草綱目

薛立齋治一男子臟毒下血服涼敗毒藥不惟血不能止且飲食少思肢體愈倦脉數按之則瀋先以補中益氣湯數劑少止更以六君子湯如升麻炮薑四劑而止乃去炮薑加芎歸月餘脾胃亦愈嘗治積熱或

風熱下血者先以敗毒散散之胃寒氣弱者用四君子湯或參苓白朮散補之並效

一男子臟毒下血脾氣素弱用六君子湯加芎歸枳壳地榆槐花治之而愈後因謀事血復下諸藥不應意思慮傷脾所致投歸脾湯四劑而痊大抵此症所致之由不一當究其因而治之丹溪云芎歸湯一劑又調血之上品熱加茯苓槐花冷加茯苓木香此則自根自本之論也雖然精氣血出于穀氣惟大腸下血

以胃藥收功以四君子湯參芪白朮散以枳殼散小
烏沉湯和之胃氣一回血自循經絡矣腸風者邪氣
外入隨感隨見臟毒者蘊積毒久而始見又云人惟
坐卧風濕醉飽房勞生冷停寒酒麵積熱以致榮血
失道滲入大腸此腸風臟毒之所作也挾熱下血清
而色鮮腹中有痛挾冷下血濁而色黯腹內畧痛清
則為腸風濁則為臟毒有先便而後血者其來也遠
有先血而後便者其來也近世俗尿前尿後之說非

也治法大要先當解散腸胃風邪熱則敗毒散冷不
換金正氣散加芎歸後隨其冷熱治之河間云起居
不節用力過度則絡脉傷陽絡傷則血外溢血外溢
則衄血陰絡傷則血內溢血內溢則便血腸胃之絡
傷則血溢腸外有寒汁沫與血相搏則併合凝聚不
得散而成積矣又內經云腸癖下膿血脉弦絕者死
滑大者生血溢身熱者死身涼者生諸方皆謂風熱
侵于大腸而然若飲食有節起居有時腸胃不虛邪

氣何從而入

王執中云何教授湯簿有腸風疾積年不愈取脊端窮骨名龜尾當中一灸除根湯簿因傳此方後觀灸經此穴療小兒脫肛瀉血蓋岐伯灸小兒法也後人因之以灸大人腸風瀉血耳蓋大人小兒之病初不異故也五痔便血失屎迴氣灸百壯在脊窮骨上赤下白處

痔

附脫肛

孫文垣治周文川肛上生一腫毒月餘膿潰矣但少動則出鮮血不止大便秘結胸膈飽悶飲食不思脉之兩寸短弱關弦尺洪滑此氣虛血熱陷于下部宜補而升提不然痔漏將作可慮也黃芪二錢歸身地榆槐花枳殼各一錢升麻秦艽各七分荆芥穗五分甘草三分服後胸膈寬惟口苦甚前方加酒連連翹各五分而愈

高仰山內人痔血裡急後重飲食入腹大便即行晝夜

五六度五更咳嗽痰胸肌肉脫口作渴由服涼血之劑過多致脾虛不能統血也脉之六部皆軟弱無力以君子湯加荆芥穗秦艽陳皮炮薑四帖而飲食進血全止嗽亦定減炮薑倍加何首烏又四帖遂數年不發

徐檢老發寒熱腎近肛硬處生一毒紅腫而痛坐卧為艱外科以纜針點開插藥綫于內塗以爛藥使膿血急潰又與敷生肌藥使易收口受謝而去未半月硬

處之旁又紅腫痛寒熱交作召前醫治法如前受謝
以去逋醫逋患幾年矣診之面色青慘脉皆濡弱
手足如冰飲食減半究所服則槐角生地黃栢之屬
曰此痔癰非痔漏也痔漏當用桂綫以五灰膏點之
可愈今腫硬無定處離肛門且遠其初只可大補氣
血即有毒亦宜托出一膿而愈此王道之治不勝于
針刀萬萬哉乃內用寒涼外用收口動輒挂綫致凝
滯流注愈而屢發非稟厚氣強六旬餘安能當此與

十全大補四帖飲食加手足煖大便艱澇向潤之而不行者今亦通利再以首烏四兩人參枸杞當歸黃芪熟地各二兩槐角秦艽各一兩蜜丸服之腫處出少膿全瘳徐喜而謔曰予非孫君諸外科視此臀為金穴矣呵呵

醫學博士齊德之云予讀養生必效方見乾義傳僧覺海少年患痔疾其行業比冰霜緣此飽食久坐知痔疾者不必酒色過度矣故素問云因而飽食筋脉橫

解腸癖為痔治之故不同也三神丸枳殼皂角五倍

蜜丸每服二三十九

精義

黃履素曰予中年患痔點洗都不效惟白蘿蔔煎湯頻洗差佳近讀環集中載冬瓜皮同朴硝煎洗翻花痔立愈又法以白蘿蔔代冬瓜亦效冬瓜未之試蘿蔔已驗矣

薛立齋治儒者楊舉元素陰虛勞則肢體倦怠兩足發熱服清熱等藥熱至腰膝大便瀉滯飲食過多則瀉

至年餘作渴吐痰患痔出膿仍不節勞則忽惡寒發
熱復患癰膿水不止氣血虛甚仍用六味丸補中益
氣湯滋養化源喜其慎疾年餘而痊

陳自明治一男子患痔未成膿苦痛大便難與神仙太

乙丹一錠去後二吹痛即止不日而消

見蠱門

薛立齋治一男子患痔大便燥結焮痛作渴脉數按之
則熱以秦艽蒼朮湯二劑少愈更以四物湯加苓連
槐花枳殼四劑愈

一男子素不慎酒色患痔焮腫肛門墜痛兼下血大便
乾燥脉洪大按之則澹以當歸郁李仁湯加桃仁四
劑少愈更以四物湯加紅花桃仁條芩槐花數劑而
愈大抵醉飽入房則筋脉橫解或精氣脫泄脉絡
一虛酒食之毒乘虛流注或淫極強固精氣遂傳大
腸以致木乘火熱而毀金或食厚味過多必成斯疾
夫受病者燥氣也為病者濕熱也宜以瀉火和血潤
燥疎風之劑治之若破而不愈即成漏矣有串臀者

有串陰者有穿腸者有穢從瘡口而出者形雖不同
治法頗似其腸頭腫成塊者濕熱也作痛者風也大
便燥結者火也潰而為膿者熱勝血也當各推其所
因而治之

一男子患痔成漏每登廁則痛以秦艽防風湯加條芩
枳殼四劑而愈以四物加升麻芩連荆防不復作

一男子患痔漏每登廁則肛門下脫作痛良久方收以
秦艽防風湯數劑少愈乃去大黃加黃芪川芎白芍

而痛止更以補中益氣湯二十餘劑後再不脫

一婦人患痔腫焮痛甚以四物湯加苓連桃仁紅花丹皮四劑少止又數劑而愈

一婦人素患痔漏每因熱則下血數滴以四物湯加黃連治之即愈後為大勞瘡腫痛經水不止脉洪大按之無力此勞傷血氣血動而然也用八珍湯加苓連蒲黃二劑而止後去蒲黃苓連加地骨皮數劑而安丹溪云婦人崩中者由臟腑傷損衝任二脉血氣俱

虛故也二脉為脉經之海血氣之行外循經絡內營
臟腑若氣血調適經下依時若勞動過極臟腑俱傷
衝任之氣虛不能約制其經血故忽然而下謂之崩
中暴下治宜大補氣血之藥舉養脾胃微加鎮墜心
火之藥治其心補陰瀉陽經自正矣

一男子有痔漏每發如廁肛脫良久方止診其脉細而
微用補中益氣湯三十餘劑遂不再作丹溪曰脫肛
屬氣熱氣虛血虛血熱氣虛者補氣參芪芎歸升麻

血虛者四物湯血熱者涼血四物湯加黃柏肺與大腸為表裡故肺臟蘊熱則肛閉結肺臟虛寒則肛門脫出有婦人產育用力小兒久痢亦致此治之必須溫補肺臟腸胃久則自然收矣

臨安曹五方黃院薦引為高宗取痔得效後封曹官至察使用好信石色黃明者三錢打如豆大明礬一兩為末好黃丹水飛炒紫色五錢蝎稍七個淨洗瓦上焙乾研末草烏緊實光滑石去皮生研末一錢右用

紫泥罐先將炭火煨放冷拭淨先下明礬燒令沸次
下信入礬內拌勻文武火煨候沸再攪勻看罐通紅
烟起為度將罐撮下待冷取研末方入草烏黃丹蝎
稍三味再同研極細入磁罐內收貯如欲敷藥先煎
甘草湯或葱椒煎湯洗淨患處然後用生麻油調前
藥以鷲毛掃藥痔上每日敷藥三次必去黃水如膠
汁然痔頭漸消看痔病年深淺年遠者不出十日可
取盡日近者俱化黃水連根去盡更搽生好肉藥應

是五痔皆去之

名如神
千金方

李防禦方五痔原痔者貧富男女皆有之富者酒色財
氣貧者擔輕負重饑露早行皆心肝二血喜則傷心
怒則傷肝喜怒無常風血侵于大腸到穀道無出路
結積成塊出血生乳各有形相婦人因經後傷冷月
事傷風餘血在心經血流于大腸小兒因利後或母
腹中受熱也先用水澄膏護其肉鬱金白芨各一兩
或加黃連右二味為末如內痔候登廁翻出在外用

溫湯洗淨不須坐側卧于牀即出用蜜水調令得中
篋葎塗穀道四邊好肉上留痔在外以紙蓋藥上良
久方用枯藥搽痔上用筆蘸溫水于紙上不令藥乾
及四散枯藥用好白礬四兩生信石二錢半硃砂一
錢生研極細右各研為細末先用砒入紫泥罐次用
白礬末蓋之用火煨令烟斷其砒盡隨烟去止借砒
氣于礬中耳用礬為極細末看痔頭大小取礬末在
掌中更入硃砂少許以唾調稀用篋頭塗痔上周遍

一日三上候看痔頭顏色焦黑為度至夜有黃水出
切勿他疑水盡為妙至中夜上藥一遍來日依然藥
三次有小痛不妨換藥時以椀盛新水或溫湯在邊
用筆輕洗痔上舊藥更上新藥仍用護肉藥次用荆
芥湯洗之三兩日後黃水出將盡却于藥中增硃砂
減白礬則藥力即緩三兩日方可增減漸漸取之庶
不驚人全在用藥人看痔頭轉色增減厚薄傳藥方
是活法此藥只是借砒信耳又有硃砂解之一方士

將此二方在京治人多效致富一富商因驗以百金求得之錄于予予雖未用傳人無不言效但枯藥趙宜真煉師以刊于青囊襍纂如神千金方未見刊傳大抵今人言能取痔者皆此方也恐氣血虛或內邪者還當兼治其內庶不有失

二條皆外科發揮

薛立齋治一男子痔瘡腫痛便血尤甚脉洪且瀉經云因醉飽筋脉橫解脹僻為痔蓋風氣通于肝肝生風

風生熱風客則淫氣傷精而成斯疾遂與黃連當歸
芪生地防風枳殼白芷柴胡槐花地榆甘草治之漸
愈次以黃連丸而瘥

一男子患痔脉浮鼓午後發熱作痛以八珍湯加黃芪

柴胡地骨皮治之稍可彼欲速效用劫藥蝕之痛甚

絕食而歿

此用枯藥者宜先治其內
內愈而後可治其外也

夫瘡之潰斂氣

血使然也脉浮鼓日晡痛此氣血虛也丹溪云瘡口

不合用大劑參芪朮歸芎補之外以附子餅灸之更

以補藥作膏貼之

一男子年踰四十有痔漏大便不實服五苓散愈加泄瀉
飲食少思此非濕毒乃腸脾胃虛也當以理中湯治之
不信仍服五苓愈甚乃以理中湯及二神丸月餘而平
李遠因痔瘡怯弱以補中益氣湯少加苓連枳殼治之
稍愈後因怒加甚時仲冬脉得洪大謂脉不應病此
乃腎水不足火來乘之藥不能治果歿于火旺之月
常見患痔者腎脉不足俱難治

劉商有痔肛門脫出此濕熱下注真氣不能升舉診其
脉果虛遂以四君子湯加黃芩芍歸蒼朮黃柏升麻
柴胡服之更以五倍子煎湯熏洗彼以為緩乃用砒
霜等毒藥蝕之而歿夫劫藥特治其末且能伐真元
鮮不害人慎之

徐生因痔氣血愈虛飲食不甘小便不禁夜或遺精此
氣虛兼濕熱而然非瘡故也以補中益氣湯加山茱
山藥五味兼還少丹治之而愈

一男子患痔漏膿出大便諸藥不應診其脉頗實令用
猪腰一個切開入黑牽牛末五分線札以荷葉包煨
熟空心細嚼溫鹽酒送下數服頓退更以托裡藥而

愈

即煨
腎散

朱丹溪治一人肛門生瘡後不收口有鍼竅三孔穴邊
有膿用黃芪條芩連翹秦艽右末之神曲丸服治法

予庚戌除夕痔作時官舍合肥艱得醫者取官局釣腸
丸一百二十粒分為二服熱酒併服之中夜腹間微

痛下少結屎旦起已安治証具載本方所以作效速者以服多故耳

百乙方

葱青內刮取涎對傳入蜜調勻先以木鷲子煎湯熏洗然後傳藥其冷如冰唐仲舉云嘗有一吏人苦此渠族弟親合與之早飯前敷午後以榜紙來謝拜于庭下疾已安矣

鄭器先用之親曾得效其法鳩尾骨尖少偃處即是穴麥粒大艾炷灸七壯或十四壯甚者二十一壯上瘡

發即安可除根本

並百乙方

薛立齋治一人痔漏口乾胃脉弱此中氣不足津液短少不能上潤而然以黃芪六一湯七味白朮散治之或曰諸痛痒瘡皆屬心火遂服苦寒之藥大便不禁而歿夫諸痛痒皆屬心火言其常也始熱終寒則反常矣可泥此而不察乎

許叔微治一人腸風脫肛不收有血下用皂角三莖槌碎水一碗揉令皂角消盡用絹二重瀘去清汁數分將

脫肛腸浸在藥中其腸自收不用手托如大腸收了
更用湯盪其脫肛上令皂角氣行則不再作三次盪愈
龔之才治小兒脫肛因久患瀉痢所致宜用葱湯熏洗
令軟送上或以五倍子末敷而頻托入又以五倍子
煎湯洗亦可又以鱉頭燒存性香油調敷一云此物
燒烟熏之久自收又以東壁土泡湯先熏後洗亦效
蘇東坡與程正甫書云凡痔瘡宜斷酒肉與鹽酪醬菜
厚味及粳米飯唯宜食淡麵一味及以丸蒸胡麻即

黑芝麻同去煎皮茯苓少入白蜜為麵食之日久氣力不衰而百病自去而痔漸退此乃長生要訣但易知而難行耳

江夏鐵佛寺蔡和尚病肛門痔漏不可忍有人教用木蠶仁帶潤者雌雄各五個乳細作七丸盪覆濕處勿令乾每以一丸唾化開貼痔上其痛即止一夜一丸

自消也後用治數人皆效

瀨湖集酒方
本草綱目

張子和治趙君玉常病痔鳳眼草刺蝟皮槐根狸首之

類皆用之或以乾薑作末塗猪肉炙食之大便燥結不利且瘤疑痿後數日因病黃大涌瀉數不言痔作矣

漏瘡

薛立齋治一男子腎患漏口乾發熱喜膿不清稀脉來遲緩以豆豉餅灸及服八珍湯加麥冬五味子軟柴胡地骨皮三月餘而愈後因不慎房勞復潰膿清脉大辭不治果歿河間云因病致虛則為輕蓋病勢尚淺元氣未虛也至病初愈而勞復飲食勞倦或房勞

七情六慾陽痿陰弱如致羸損此因虛致損則為重病勢已過元氣已索之故也

一男子年逾二十稟弱左腿外側患毒三月方潰膿水
清稀肌肉不生以十全大補湯加牛膝二十餘劑漸
已更以豆豉餅灸之月餘而痊又一媪左臂結核年
餘方潰膿清不斂一男子患貼骨癱腿細短軟瘡口
不合俱飲十全大補湯外用附子餅及貼補藥膏調
護得宜百貼而愈大凡不足之症宜大補之兼灸以

接補陽氣祛散寒邪為上

京師董賜年逾四十胸患瘡成漏日出膿椀許喜飲食如常以十全大補湯加貝母遠志白薇續斷灸以附子餅膿漸少謹調護歲餘而愈

一男子患漏時值陰寒忽惡寒右手脉有而似無此胃氣虛而不任風寒也以四君子湯加炮薑肉桂二劑少止又四劑而安

姚應鳳治鄭孝廉患流注穿漏垂死應鳳曰氣從下洩

難奏功乃取藥作靡周身封以敗楮隙肩井穴吸之
而愈

腎癰

薛立齋治一弱人腎癰膿成不潰以十全大補湯數劑
始托起乃針之又二十餘劑而愈此症弱人宜補氣
血為安

一人腎癰焮腫痛甚此邪毒壅滯用活命飲隔蒜灸而
消後因飲食勞倦腫痛復作寒熱頭痛此元氣虛而

未能復與補中益氣湯頻用葱熨法兩月而愈

一男子臀腫一塊微痛脉弦緊以瘡科流氣飲四劑而消
崑庠吳轉之父患此內潰腫脹發熱口乾飲食少思此
脾虛弱也先用六君子加芎歸芪數劑而潰又用十
全大補湯倍加參芪五十餘劑而愈

一男子硬痛發熱此膀胱氣虛而濕熱壅滯用內托羌
活湯二劑熱痛悉退後用托裡消毒散而潰又用托
裡散四十餘劑而斂

一男子腎癰腫硬作痛尺脉浮緊按之無力以內托羌活湯一劑痛止以金銀花散四劑膿潰而愈

一男子腎癰腫硬痛甚隔蒜灸之更服仙方活命飲二劑痛止腫消以托裡消毒散加黃柏蒼朮羌活瘡頭潰而愈

一男子腎癰作膿而痛以仙方活命飲二劑痛止更以托裡消毒散膿潰而瘥

一男子腎癰不作膿飲食少思用六君子湯加芎歸黃

芪飲食漸進更以托裡消毒散膿潰而愈

一男子潰而膿清不斂以豆豉餅灸之更飲十全大補湯兩月餘而痊凡瘡不作膿或不潰或潰而不斂皆氣血之虛也若膿清稀尤其虛甚也

一男臀癰膿水不止肌肉漸瘦飲食少思胃脉見弦以六君子湯加藿香當歸數劑飲食漸進以十全大補湯及豆豉餅灸之兩月餘而斂

一弱人臀漫腫色不變脉滑數而無力此臀癰也膿將

成尚在內欲治以托裡藥待發出而用針彼欲內消服攻伐藥愈虛復求治仍投前藥托出針之以大補藥而愈凡瘡毒氣已結不起者但可補其血氣使膿速成而針去不可論內消之法膿成又當辨其生熟淺深而針之若大按之乃痛者膿深也小按之硬痛者膿淺也按之不甚痛者未成膿也按之即復起者有膿也按之不復起者無膿也若腫高而軟者發于血脉腫下而堅者發于筋骨色不相變者發于骨髓也

此條舊案已收因無後段發明故錄之

一男臀癰腐潰肌肉不生用藥敷之四沿反硬診之脉
瀋而弱此氣血不能營于患處故敷涼藥反硬乃氣
血受寒凝結而非毒也用大補藥愈矣

一人患臀癰用五爪龍連枝搗汁酒漉服日進四五次
膿從大便出未成膿者內消如有頭以渣敷上立散

治魚口極效

廣筆記

曹水部文兆年逾四十解胛患毒已半月餘頭甚多狀

如粟許內痛如賴飲食不思怯甚脉歇至此元氣虛
疽畜于內也非灸不可遂灸二十餘壯以六君子湯
加藿香當歸數劑瘡勢漸起內痛頓去胃脉漸至但
瘡色尚紫瘀肉不潰此陽氣尚虛也燃桑柴灸之以
補接陽氣解散其毒仍以煎藥加參芪歸桂色赤膿
稠瘀肉漸腐取去兩月餘而愈夫邪氣沉伏真氣怯
弱不能起發須灸灸而兼大補投以常藥待其自潰
鮮有不誤者

沈侍御患臀腫痛小便不利彼謂關格症以艾蒸臍大便赤不利以降火分利之藥治之不應診其脉數膿成此癰患也遂針之出膿數椀許大便即利五日陰囊腫脹小便不行仍針之尿管大泄氣息奄奄細汗不止潰處愈張復用大劑參芪歸朮之藥猶緩俾服獨參湯至二斤氣稍復又服獨參膏至兼以托裏藥兩月餘而平大抵瘡瘍膿血之泄先補氣血為主雖有他病當從未治

滕千兵年逾五十腎患癰膿熟不開攻通大肛膿從大便而出辭不能治果斃丹溪云腎居小腹之後陰中之陰也道遠位僻血亦罕周中年後尤慮患此况膿成不刺欲不亡得乎

續名醫類案卷五十三

欽定四庫全書

續名醫類案卷五十四

錢塘魏之琇撰

囊癰

薛立齋治一男子囊癰未作膿而腫痛以加味龍膽瀉
肝湯二劑少愈更以四物湯加木通知母黃柏而愈
一男子焮腫痛甚小便瀆發熱脉數以龍膽瀉肝湯倍
用車前子木通茯苓四劑勢去其半仍以前湯止加

黃柏金銀花四劑又減二三便利如常惟一處不消
此欲成膿也再用前湯加金花白芷角刺六劑微腫
痛脈滑數乃膿已成令針之腫痛悉退投滋陰托裏
藥乃紫蘇末敷之愈

一膏粱之客陰囊腫脹小便不利此中焦積熱乘虛下
注先用龍膽瀉肝湯加黃柏牛膝四劑漸愈後用補
陰八珍湯加柴胡山梔而愈後不守禁忌前症復作
仍用補陰八珍湯補中益氣湯六味丸而痊又因勞

倦發熱自用四物知柏之類虛症悉具瘡口大開此
五臟氣血俱虛也朝用補中益氣夕用六君加當歸
各五十餘劑瘡口始斂又用六味丸調理而愈

知州黃汝道先晡熱發熱肢體倦怠入房則腿足痠軟
足心熱至腿膝六脉洪數兩尺為甚此足三陰虛欲
滋補化源彼反服苦寒降火之劑後陰囊腫脹用治
疝藥腫脹益甚形氣愈虛服溫補之劑腫痛上攻小
便不利兩尺脉洪按之虛甚曰此囊癰也因氣血虛

而不能潰先用補中益氣湯加山藥山萸車前柴胡
山梔一劑腫脹頓消隨用六味丸料加車前牛膝柴
胡山梔一劑小便漸通乃用活命飲與前二藥消息
間用至二十餘劑囊裂出穢膿甚多乃用托裏消毒
散六劑膿穢穢清又用托裏散數劑膿水漸少更用
補陰托裏散及十全大補五十餘劑而痊

府庠李達卿素腎虛發熱久服知柏之類形體漸瘦遺
精白濁晡熱唾痰此腎水虧損虛火內熾用補中益

氣之類加五味麥冬前症將愈又別用清熱涼血之劑飲食少思唾痰不止此脾虛復損不能攝涎歸源仍用前湯加茯苓半夏而愈後入房頭暈吐痰腰骨作痛大小便道牽痛此精已耗而復竭所致危殆之症也遂朝用前湯加麥冬五味夕用六味丸料加五味草薢五十餘帖諸症頓退後又入房陰囊陰莖作痛別用淡滲之劑陰囊內潰乃用補陰托裏之劑出膿甚多喜腫消痛止竟不善調養致大便不通小便

如淋疾涎上涌此腎虛之症復作矣誠為可慮有保
其可生者用礞石滾痰丸牛黃清心丸之類吐痰愈
加曰非惟無一保其生而反促其危矣辭不治果歿
一男子患此腫痛發熱以上柴胡湯加黃連青皮四劑
少愈更以加減龍膽瀉肝湯而愈

一男子膿熟作脹致小便不利令急針之以小柴胡湯
加黃柏白芷銀花四劑少愈更以托裏消毒散數劑
而痊

一男子囊腫狀如水晶時痛時痒出水小復按之作水聲小便頻數脉遲緩此醉後飲水入房汗出遇風寒濕毒乘聚于囊為患名水疝也先以導水丸二服腹水已去小便如常再飲胃苓散倍苓朮更用氣針引去聚水而痊

一男子患久而不斂以十全大補湯加五味子麥冬灸以豆豉餅月餘而平

一弱人腫痛未成膿小便赤濇以灸甘草青皮木通黃

柏當歸麥冬四劑少愈以青蓮子飲而消

一男子病勢已盛脉洪大可畏用前湯二劑腫少退以
仙方活命飲二劑痛少止脉之滑數乃膿已成須針
之否則囊皆潰不信遂更他醫果木潰罨丸挂懸復
求治診之脉將靜以八珍湯加黃芪知柏山梔更敷
紫蘇未數日而痊此症勢雖可畏多得保全患者勿懼
一弱人膿熟脹痛大小便秘結針之膿出三椀許即斫
睡覺而神思少健但針雖敷解毒藥亦潰盡矣故用

托裏藥三十餘劑始痊大抵此症屬陰道虧濕熱不利所致故滋陰除濕為要常治腫痛小便秘瀉者用除濕為主滋陰佐之腫痛退便利和者除濕滋陰相兼治之欲其成膿用托裏為主滋陰佐之膿成即針之仍用托裏滋陰濕毒已盡專用托裏如膿清或多少或斂遲者用大補之劑及豆豉餅或附子餅灸之如盧武選封君年逾五十患此瘡口年餘不斂診之微有濕熱以龍膽瀉肝湯治之濕熱悉退乃以托裏藥

及豆豉餅灸之而愈次年復患濕熱頗盛仍用前湯
四劑而退又以滋陰藥而消若潰後虛而不補少壯
者成漏老弱者不治膿清作渴脉大者亦不治

朱丹溪曰癰疽入囊者予嘗治數人悉以濕熱入肝經
施治用補陰佐之雖膿潰皮脫畢丸懸挂皆不死

心法外科

薛立齋治胡同知年逾五十陰囊腫痛得熱愈甚服蟠
葱散等藥不應肝脉數此囊癰也乃肝經濕熱所致
膿已成急針之以龍膽瀉肝湯脉症悉退更以托裏

滋藥外搽杉木灰紫蘇末月餘而愈此症雖潰盡而無害患者審之

柏道官年六十餘陰囊已潰痛不可忍腎丸露出與龍膽瀉肝湯服之及敷前末不應意此濕氣熾甚先以槐花酒一碗仍以前藥少愈更以托裏加滋陰藥月餘而平設以前不應加之峻利未有不損中氣以致敗者也聘士陳時用沈汝和患此悉用前藥而愈

竇材治一人忽遍身拘急來日陰囊連莖大腫如斗六

脉沉緊此陰疽也幸未服解毒涼藥若服之則莖與
畢丸必皆爛去而死急令服救生湯五錢又一服全安

懸癰

薛立齋治一弱人穀道前結核如大豆許勞則腫痛先
以十全大補湯去桂枝車前麥冬酒炒黃柏知母少
愈更服製甘草漸愈

即國
老齋

仍以物車前之類而消

一男子患此焮腫發熱以龍膽瀉肝湯二劑及製甘草四
劑而潰再用滋陰之劑而愈若膿未成以葱炒熟敷

上冷則易之隔蒜灸之亦可數日不消或不潰或潰而不斂以十全大補湯加柴胡梢為主間服製甘草並效若不保守必成漏矣

一男子患懸癰服坎離丸及四物知柏之類不應脉浮洪按之微細以為足三陰之虛用托裏散及補陰八珍湯愈又用六味丸補中益氣湯調補化源半年而痊大凡瘡瘍等症若腎經火氣亢盛致陰水不能生化而患陰虛發熱者宜用坎離丸取其苦寒能化水

中之火令火氣衰而水自生若陽氣衰弱致陰水不能生化而患陰虛發熱者宜用六味丸取其酸溫能生火中之水使陽氣旺而陰自生况生此症屬腎經精氣虧損者十有八九屬腎經陽氣亢盛者十無一二然江南之人患此者多屬脾經陰血虧損元氣下陷須用補中益氣湯升補陽氣使陽生而陰長若嗜慾過多虧損真陰者宜用六味丸補腎經元氣以生精血仍用補中益氣湯以培脾肺之生氣而滋腎水

經云陰虛者脾虛也但多認為腎經火症用黃柏知母之類復傷脾肺絕其化源反致不起惜哉

通府張敬之患懸癰久不愈日晡熱甚作煩渴而喘或用四物湯知柏之類病益甚肢體倦少食大便不實小便頻數問何故曰此肺虛之症前藥復傷而然遂用補中益氣加茯苓半夏數劑飲食漸進症漸減更加麥冬五味調理乃痊經曰脾屬太陰為陰土而主生血故東垣云脾虛元氣下陷發熱煩渴肢體倦怠

等症用補中益氣湯以升補氣而生陰血若誤認為
腎虛火盛而用四物知柏之類反傷脾胃生氣是虛
其虛矣况知柏乃瀉陽損陰之劑若非膀胱陽火盛
而不能生陰水以致發熱者不可用也

魏玉橫治江雲溪兄初春患痔即令服一炁湯加減不
信致臥月餘後遂成管冬月復患懸癰初時如大豆
半月來大如雞卵按之甚痛行動有妨幸未服藥脉
之惟左關尺畧大而微此膿尚未成也仍與一炁湯

加減大生地麥冬北沙參甘杞子生米仁萸仁丹皮
蒂丁等令服八劑二劑知四劑消其半八劑完而全愈
薛立齋治尚寶鮑希傳足發熱服四物知母黃柏之類
年餘患懸癰唾痰作渴飲湯其熱至膝更加芩連二
陳熱痰益甚問故曰此足三陰虧損水泛為痰寒涼
之劑傷胃而甚耳遂先用補中益氣夕用六味丸間
佐以當歸補血湯半載乃愈

上舍劉克新潰後作痛發熱口乾小便赤色自用清熱

消毒之藥不應左尺洪數此陽氣盛而陰氣虛也先用四物湯加知母等諸劑瀉其陽氣使陰自生數劑諸症漸愈後用益氣湯地黃丸補脾肺滋腎水而愈一儒者小便赤澹勞則足軟腫痛發熱口乾舌燥食少體倦日晡益盛此氣血虛而未能潰也遂用八珍加麥冬山藥倍用製甘草數劑諸症悉退但患處腫痛此膿內焮也又五劑膿自涌出又五十餘劑而瘡口將完又因勞役且停藥寒熱作渴膿多腫痛用補中

益氣湯加炒梔二劑少愈又以八珍湯加麥冬五味
百餘劑腫痛悉去喜其慎起居節飲食常服補劑而
安但勞則膿出一二滴後惑于他言內用降火外用
追蝕必其收斂致患處大潰幾至不起仍補而愈

一男子腫痛小便赤澀以加減龍膽瀉肝湯加製甘草
二劑少愈以參芪歸朮知柏製甘草四劑而潰更以
四物湯加知柏參芪製甘而愈

一男子膿清不斂內有一核以十全大補湯加青皮柴

胡製甘草更以豆豉餅灸之核消而斂

一男子久而不斂脉大而無力以十全大補湯加五味
麥冬灸以豆豉餅月餘而愈

一老人年餘不斂診其脉尚有濕熱以龍膽瀉肝湯二
劑濕退乃以托裏藥及豆豉餅灸之而愈

一男子腫痛發熱以小柴胡湯加黃連青皮四劑少愈
更以加減龍膽瀉肝湯而消

一男子膿不潰脹痛小便不利急針之尿膿皆利更以

小柴胡湯加黃柏白芷金銀花四劑痛止以托裏消
毒四劑而愈常見患者多不肯用針待其自破殊不
知緊要之地若一有膿宜灸針之使毒外發不致內
潰故前人云凡瘡若不針烙毒結無從而解膿瘀無
從而泄又云宜開戶以逐之今之患者反謂地部緊
要而不用針何其悖哉

一男子膿熟不潰脉數無力此氣血俱虛也欲治以滋
陰益血之劑更針之使膿外泄彼不從仍用降火敗

毒藥致元氣愈虛瘡勢愈甚後潰不斂竟至不救夫
懸癰之症原係肝腎二經陰虛雖一于補尤多不治
况膿成而又尅伐不死何俟常治初起腫痛或小便
赤澆先以製甘草一二劑及隔蒜灸更飲龍膽瀉肝
湯若發熱腫痛者以小柴胡湯加車前黃柏芎歸膿
已成即針之已潰者用八珍湯加製甘草柴胡稍酒
炒知柏小便澆而脉有力者仍用龍膽瀉肝湯加製
甘草小便澆而無力者用清心蓮子飲加製甘草膿

清不斂者用大補之劑間以豆餅灸之久而不斂者用附子餅灸之並效

一男子患此焮痛發寒熱以小柴胡湯加製甘草二劑少退又製甘草四劑而消大抵此症屬陰虛故不足多此患寒涼藥不可過用恐傷胃氣惟製甘草一藥不損氣血不動臟腑其功甚捷最宜用之不可忽也

馬銘鞠治談公武患跨馬癱外勢不腫毒內攻膿多瘡口甚小突出如指大一塊觸之痛不可忍多飲寒劑

外敷涼藥毒內攻胃氣俱損令盡去圍藥洗淨瘡口
但用一膏藥以護其風用大劑黃芪山藥生地白芷
牛膝米仁銀花襟以健脾藥十餘劑膿盡再數劑肉
長突出者平矣後服六味丸斤許精神始復

廣筆記

薛立齋治黃吏部穀道前患毒焮痛寒熱此肝經濕熱
所致名曰懸癰屬陰虛症先以製甘草二服頓退再
以四物加車前子青皮甘草節酒製知柏數服而消
一男子歲逾五十患懸癰膿清肝腎脉弱此不慎酒色

濕熱壅滯也然膿清脉弱老年值此何以收斂况穀道前為任脉發源之地肝經宗筋之所辭不治後果死嘗治此癰惟澗水製甘草有效已破者兼十全大補湯為要法

柴嶼青以省覲舟行舟人患騎馬癰哀號痛楚憐而治之先用大歸湯十餘劑外貼回生膏日令其以藥水勤洗繼惟十全大補湯因貧人苦無力購參攜有扁黨參給以半斤始備藥又用玉蟾生肌散人參末敷患

處調理月餘而愈

瘰癧

一名便癰一名便毒一名瘡子
一名血疔又俗名一石米瘡

薛立齋治一婦人拗中赤腫脹痛此膿內作用托裏消
毒散加柴胡數劑潰而膿清寒熱乃氣血復虛用托
裏散而寒熱止用十全大補百餘劑而痊

一婦人腹拗腫痛小水不利時或胸乳作痛脇腹作脹
此肝火氣滯四物加柴胡青皮元胡索木香而愈

一婦人拗中作痛小腹痞悶小便不利內熱體倦飲食

少思此肝火內動脾胃受傷也用加味歸脾胃湯柴
胡青肝散而安

一婦人拗中腫脹小腹作痛服下血之劑其痛益甚更
吐瀉少食此肝脾復傷用六君子湯加升麻柴胡而愈
一婦人兩拗腫痛腹內一塊不時上攻月經不調一便
不利此肝脾氣滯而血傷以四君加芍歸柴胡山梔
而愈後因鬱怒前症復作兼胸滿腹脹盜汗此肝木
甚而傷脾土也用加味歸脾湯下蘆薈丸而痊

一婦人小腹內作痛或痞悶兩脇腫痛內熱寒熱胸膈不利飲食不甘形體日瘦此肝氣滯而氣傷也朝用補中益氣湯夕用蘆薈丸漸愈更用六味丸全愈

一婦人兩脇腫痛小腹痞脹白帶時下寒熱往來小水淋瀝此肝氣滯而血病用龍膽瀉肝湯漸愈又用加味逍遙散六味地黄丸全愈

一婦人患前症胸脇脹悶或小水不利或時腹痛此肝火氣病先用龍膽瀉肝湯以清肝熱又用加味逍遙

散以生肝血六味地黄丸以滋腎水而愈

一婦人患前症內熱作渴飲食不甘肢體倦怠陰中作梗小便赤澹此脾經鬱結肝經濕熱用加味歸脾湯而愈後因怒氣復作小腹脹痛用小柴胡加山梔芍歸痛止又用加味道遙散而愈

一婦人小腹痞悶溺澹內熱體倦懶食此肝火動而脾血傷也用八珍加柴胡山梔膽草而安

一婦人陰中如梗兩拗腫痛熱寒不食小便頻數小腹

重墜此肝脾鬱怒所致先以補中益氣加茯苓山梔
車前子青皮以清肝火升脾氣更以加味歸脾湯調
理脾鬱而愈

一婦人小腹內如有所桔兩拗並入門俱腫小便淋瀝
經候不調內熱作渴飲食少思腹內如雞卵而漸大
脉洪數而虛左關尤甚屬肝膽鬱結之症也用加味
歸脾湯肝火退而脾土健間以逍遙散下蘆薈丸而愈
一男子患便毒焮腫作痛大小便秘脉有力以玉蠟散

二劑頓退更以龍膽瀉肝湯四劑而愈

一男子已潰而痛不止小便秘塞此肝火未解也以小柴胡加黃柏知母芍歸痛止便利更以托裏當歸湯而瘡斂若毒未解而痛不止者須用活命飲

春元凌待之虛而服尅伐藥幾致危殆用托裏健脾藥而愈秀才王文遠因勞枯之患服小柴胡湯及表症散後用托裏藥膿成針之而旬日愈又胡判官膿清脉弱以大補藥而已愈因新婚復發自用連翹清毒

散致瀉利不止竟致不救可見此症屬不足者多矣
非補不可大抵便毒屬肝經初起堅硬肝主筋故也
五七日後當赤軟膿成故也若尚堅硬乃元氣不能
腐化往往人見堅硬只欲內消反服攻散藥多致虛
虛之禍前此治者即其驗也

魏玉橫治宋復華凡因勞頓患左拗腫硬漸如鵝卵或
與發散轉甚已半月足冷過膝面赤手亦冷惡寒夜
熱口苦食懈脉極弦數曰此肝虛火甚也與生地杞

子沙參麥冬丹皮萸仁歸身紅花間入川棟川連
羊牛蒡數劑寒熱退又十劑其腫硬及諸症漸愈惟
小塊如豆大未消彼以要務奔走勞碌復腫數日大
如李其色赤而軟已成膿再與前藥即自潰而愈此
症俗名一石米瘡言百日後可愈也即遇先輩如立
齋其治法或未能如是雖然余非有過古人第知為
肝腎病則不禱入他藥耳

薛立齋治一婦人素清苦因鬱怒患前症或用敗毒寒

涼之藥反晡熱內熱自汗盜汗月經不行口乾咽燥
此鬱氣傷脾因藥復損先以當歸湯數劑後兼逍遙
散五十餘劑而愈

陳自明治一男子患便毒堅硬與神仙太乙丹一粒服
之去後二次痛止不日而消

方見
靈門

薛立齋治一男子患此未作膿小便秘瀉以八珍三劑
少愈以小柴胡湯加澤瀉山梔木通二劑而消

一男子腫痛發寒熱以荆防敗毒散二劑而止以雙解

散二劑而消

一男子膿未成大痛服消毒托裏內疎藥不應診之脉
洪大毒尚在以仙方活命飲一劑痛止又一劑而消

一男子腫痛日晡發熱以小柴胡湯加青皮花粉四劑
痛止熱退以神效瓜蒌散四劑而消

一男子腫而不潰以參芪歸朮白芷皂角刺柴胡甘草
節數劑而潰以八珍湯加柴胡數劑而愈

一男子潰而腫不消且不斂診之脉浮而瀋以豆豉餅

灸之更以十全大補湯月餘而愈

一男子潰而痛不止諸藥不應診之脉大按之則數乃毒未解也以仙方活命飲而止又二劑而斂

一男子服尅伐之藥以求內消致瀉利少食以二神丸先止其瀉以十全大補倍加白朮茯苓數劑而消大抵此症多患于勞役之人亦有內蘊熱毒而生者須辨虛實及成膿否不可妄投藥餌常見治此症者驟用大黃之類下之求內消或膿成令膿從大便出鮮

有見其痊也人多欲內消者蓋恐收口之難也若補養血氣不旬日而收矣何難之有若膿既成豈有可消之理如再用剋伐之劑反為難治

一男子不慎房勞患此腫痛以雙解散一服通之其痛即止更以補中益氣湯數劑而膿針之以八珍湯加五味子麥冬柴胡三十餘劑而愈大抵便癰者血症也俗呼為便毒言于不便處腫毒故為便癰也乃足厥陰肝之經絡及衝任督脉亦屬肝之旁絡且氣血

流通之道今壅而腫痛此則熱毒所致宜先疎導其滯更以托裡之劑此臨症制宜之法也

一老婦腫痛膿成未作小便瀆肝脉數以加減龍膽瀉肝湯加山梔黃柏四劑而消

張德俊灸便毒親曾取效云屢以灸他人皆驗以細草或軟篋一莖隨所患左右手量中指自手掌量中指自手掌盡處橫紋量起通三節至指盡處為則不量指甲集斷卻將此草于手腕橫紋量起引草向臂當

中草盡處即是穴麥粒大灸三壯腫散痛止即時

安

百乙方

繆仲淳親試治便毒甚驗綿地榆四兩白酒三椀煎一椀空心服雖腫者亦愈加穿山甲同患處者二片土

炒引經更妙

廣筆記

黃履素曰余家有女流患便癰兩拗腫痛不能起瘍醫用敗毒藥十餘帖以圍藥逼之出膿腫痛愈甚予查薛氏外科樞要此症皆因鬱怒傷肝得之治用加味

歸脾湯加逍遙散間服遂遵用之不三劑腫痛減半
六劑而起

孫文垣治吳翁年七十有三偶墜馬左脇作痛隨治而
愈後半年忽左胯腫痛增寒作熱諸治罔效或作疝
氣投荔枝核大小茴香川棟橘核之類痛不可忍至欲
引繩自絕診之六脉浮而洪數左尺尤甚驗痛處紅
腫如飽按之烙手此便毒也非因近色而得蓋胯屬
厥陰肝經肝為血海乃昔時墜馬惡血消之未盡畜

于經絡化而為膿年高氣虛又為香燥尅伐故痛且
劇今其色青中隱黑膿成久矣乃令外科針之出青
黑膿五六椀此俗名石米瘡也乃用內托十宣散參
芪三錢後加至五錢一日兩進兩月而愈

腿癰

薛立齋治一男子年逾二十稟弱左腿外側患毒三月
方清膿水清稀肌肉不生以十全大補湯加牛膝二
十餘劑漸愈更以豆豉餅灸之月餘而痊

滁州于侍御髀甲患毒痛甚服消毒藥其勢未減即以
槐花酒一服勢隨大去再以托裏消毒而愈

丁蘭年二十餘股內患毒日久欲求內消診其脉滑數
知膿已成曰氣血虛不潰遂刺之膿出作痛以八珍
湯治之少可但膿水清稀更以十全大補湯加炮附
子五分數劑漸愈仍服十全大補湯三十餘劑而痊
一僧患股內腫一塊不痛不潰治以托藥二十餘劑膿
成刺之作痛謂腫而不潰潰而反痛此氣血虛甚也

宜峻補之彼云痛無補法曰正氣不足不可不補補之則氣化而痛邪自除遂以參芪歸地白朮治之兩月而平

一男子腿內患癱漫腫作痛四肢厥逆咽喉閉塞發寒熱諸治不效乃邪鬱筋絡而然也用五香連翹湯一劑諸症少退又服之大便行二次諸症悉退而愈

一男子先腿痛後四肢皆痛遊走不定至夜益甚服除濕敗毒之劑不應其脉滑濕痰而瀦濁血為患以二陳湯

加蒼朮羌活桃仁紅花牛膝草烏治之而愈凡濕痰
濕熱及死血流注關節非辛溫之劑開發腠理流通
墜道使氣行血和焉能得愈

上舍李通甫腿患瘡作痛少食作嘔惡寒此痛傷胃氣
用六君子湯加當歸四劑疼痛少止飲食加進又以
十宣散加白朮茯苓陳皮數劑膿成針而出之又以
前散去防風白芷數劑而痊

一老人腿患癱自潰忽發昏瞶脉細而微此氣血虛極

也以大補之劑而甦

一男子患腿痛而不焮腫內亦便利調和用托裏榮衛湯數劑而消

一男子內股患毒腫硬痛甚不作膿隔蒜灸五十餘壯勢退七八以仙方活命飲四劑而膿成用十宣散六劑膿潰而愈凡瘡或大痛或不痛麻木灸最良

一男子腿內側患癰未作膿而腫痛以內托黃芪柴胡湯二劑少愈又二劑而消

一男子腿外側患癰漫腫大痛以托裏黃芪酒煎湯二劑少可更以托裏散數劑潰之而愈

一婦人腿癰久而不愈瘡口紫陷膿水清稀以為虛彼不信乃服攻毒之劑虛症蜂起復求治令灸以附子餅服十全大補湯百餘劑而愈凡瘡膿清及不斂者或陷下皆氣血虛極也最宜大補否則成敗症若更患他症尤難治療

一男子腿癰內潰針之膿出四五椀惡寒畏食脉診如

然此陽氣微也以四君子湯加炮附子一錢服之寒
少止又四劑而止以六君子湯加桂數劑飲食頓進
乃以十全大補湯及附子餅兩月而愈

一男子患腿癱兼筋攣痛脉弦緊用五積散加黃栢柴
胡蒼朮治之而痊

一男子腿痛兼筋攣骨痛脉弦緊以大防風湯二劑攣
少愈又二劑而腫消但內一處尚作痛脉不緊此寒
邪已去乃所滯瘀濁之物欲作膿故痛不止用托裏

藥數劑腫發起脉滑數乃膿已成矣針之用十全大補湯月餘而安

一男子右腿赤腫焮痛脉沉數用當歸拈痛湯四肢反痛乃濕毒壅遏又況下部藥難達非藥不對症也遂砭患處去毒血仍用前藥一劑頓減又四劑而消

丹溪診東陽李兄子年逾三十形瘦膚厚連得憂患又因作勞過于色忽足腿外側膝上紅腫其大如栗一醫問其大府堅實與承氣湯兩帖不效又一醫教以

大黃硃砂生粉草麒麟竭又二三貼半月後召視之
曰脉實大事去矣後果歿

馬銘鞠治江都尹子九歲患腿癰治彌月勢漸盛按之
堅如石幸兒氣厚可內消用牛膝米仁地榆生地牛
蒡銀花連翹甘草初劑加微藥利之即稍寬過兩劑
加汗微汗其勢益寬至數劑取穿山甲末五錢半入
煎半調藥送下兒善飲令一醉自此頓消半月地下
行矣初一醫欲開刀過馬中止凡外科宜以開刀為

戒廣筆
記

薛立齋治一男子患腿癰膿已成針之出二椀許飲以
托裏藥一劑大發熱更以聖愈湯二劑而止翌日惡
寒不食脉細如絲以人參一兩熟附子三片薑棗煎
再服而愈但少食不寐更與大補黃芪湯而平

一男子腿腫發熱畏寒以補中益氣湯治之彼以為緩
乃服苓連等藥熱愈甚復請治與人參養榮湯二十
餘劑而潰更以參芪歸朮灸草肉桂又月餘而斂夫

火之為病當分虛實。芩連苦寒能瀉心肺有餘之火。若老弱或飲食勞倦而發者此為不足當以甘溫之劑治之。未嘗有實熱而畏寒虛熱而喜寒者。琇按二語却未然此其驗也。

臃瘡

附爛腿

薛立齋治一婦人患臃瘡因入朝步履勞復惡寒發熱倦怠懶食而瘡出血此元氣虛而不能攝血歸經也。用補中益氣湯而愈。

陶九成曰辛酉夏余足瘍發于外臚初甚微其後浸淫涉秋徂冬不良于行凡敷膏濯之劑嘗試畧盡痛痒襍作大妨應酬一日友人俞和父見過怪其蹢躅舉以告之和父笑曰吾能三日已此疾法當先以淡齏水滌瘡口浥乾次用局方駐車丸研極細加乳香少許乾糝之無不立效如其說用之數日良愈蓋駐車丸本治血痢滯下而此瘡亦由氣血凝滯所成也

齊東

野語

張子和治小渠袁三因強人忽入家傷其兩脇外臙作
瘡數年不已膿水常涓涓然但飲冷則瘡間冷水浸
淫而出涎為濕瘡張曰爾中焦當有綠水二三升涎
數掬袁曰何也曰當被盜時感驚氣入腹驚則膽傷
足少陽經也兼兩外臙皆少陽之部此膽之甲木受
邪甲木色青當有綠水少陽在中焦如漚既伏驚涎
在中焦飲冷水咽為驚涎所阻水隨經而旁入瘡中
故飲水則瘡中水出乃上涌寒痰汗如流水次下綠

水果二三升一夕而痂乾矣

薛立齋治一室女年十七腿外臙忽腫起一紅點作痒搔破日日鮮血如注及飛小蟲甚多審其由每先寒熱兩耳下或結核蓋外臙耳下俱屬膽經膽為肝之腑肝主風熱生蟲血得風而妄行肝火旺而血出其肝膽陰陽俱虛矣凡病虛則補其母用六味丸滋腎水以生肝木四物柴胡山梔鈎藤生肝血以抑風熱而瘥

陳湖陸懋誠素因陰虛過飲入房發熱腿痛似臙瘡用
發表之劑兩腿腫黯熱氣如霧欲發瘰脉皆洪數兩
尺尤大此屬足三陰虛酒濕所乘元氣損而邪益甚
耳用十全大補加山藥山萸附子一劑脉症頓退去
附子又二劑全愈

李絳記武元衡相國在西川且苦脛瘡焮痛不可堪百
醫無效及到京城呼供奉石礫等數人療治無益有
廳吏上此方用之更瘥其方云療多年惡瘡百方不

差或痛炊走不已者並爛搗馬齒莧傳上不過三兩

度愈

李絳兵部手集

章宇泰傳治臙瘡方六郎乳母試之神效松香一兩輕粉三錢乳香五錢細茶五錢四味共打成膏先將葱頭花椒煎湯熏洗淨用布攤膏厚貼患處以絹縛定

黃水流盡爛肉生肌

廣筆記

陳儀部年逾五十兩臙生瘡日久不愈飲食失節或勞苦或服滲利消毒之劑愈甚脾脉大而無力此脾虛

而無濕熱也以補中益氣湯數劑少愈更以六君子湯加蒼朮升麻神麴治之而愈嘗治下部生瘡焮痛或發寒熱或脚氣腫痛以人參敗毒散加檳榔紫蘇蒼朮黃柏並效久不愈者以四生散治之愈後以補腎丸補之庶不再發矣

槎菴小乘云臙瘡以淡齏水滌瘡口泥乾次用局方駐車丸研極細加乳香少許乾糝之無不立效

王洪緒治馬悠也右足背連小腿轉彎處初因湯毒而

成爛腿三十餘年其腫如斗孔可容拳有時出血以布圍填塞否則空痛時年七十有四令以老蟾破腹身刺數孔以肚襍填患孔蟾身覆之早晚煎葱椒湯溫洗一次以蟾易貼用醒消丸早晚二服三日後取地丁大力鮮草搗爛填孔外貼烏金膏日服醒消丸其四圍硬塊出水處以嫩膏加五美散敷其發痒者以白花膏貼內有硬塊如石者以生商陸搗爛塗孔內出血時先以參三七末糝之然後填藥如此二十

餘日腫退痒止塊平黑肉漸紅活孔亦收淺以止草
填日以五寶散糝仍貼烏金膏因老人精神不衰飲
食不減始終不用補而收功

蔣仲芳治胡明甫年五十餘患臙瘡三載沿皮癢痒微
腫色紫黑用膏藥蓋之則流水鞋襪盡濕去膏藥即
又燥烈痒痛難忍此濕熱下流也人但知燥濕清熱
解毒而不知濕熱之原從脾家下陷耳遂用補中益
氣湯升舉其氣更加黃柏清熱蒼朮燥濕茯苓澤瀉

利水蓋治濕不利小便非其治也外用陳石灰調側
栢汁以溲濕散瘀清熱稍加大酒為從治敷之明日

瘡乾數日而愈

外治法抄

脫疽

謂疔生于足指或足消而自脫故名亦有發于
手指者名蛀節疔重者腐去去節輕者筋攣

一男子足指患脫疽愀痛色赤發熱隔蒜灸之更以人
參敗毒散去桔梗加金銀花白芷大黃痛止又十宣
散去桔梗官桂加花粉銀花數劑而痊

一男子足指患之色紫不痛隔蒜灸五十餘壯尚不知

痛又明灸百壯始痛更投仙方活命飲四劑乃以托

裏藥潰脫而愈

心法中韓判官症同
以敗毒散加銀花白芷而愈

一男子患足指大痛色赤而腫令隔蒜灸至痛止以人

參敗毒散去桔梗加金銀花白芷大黃而潰更以仙

方活命飲而痊此症形勢雖小其惡甚大須隔蒜灸

之不痛者宜明灸之庶得少殺其毒蓋因膏粱厚味

酒麪灸燂積毒所致或不慎房勞腎水枯竭或服丹

石補藥致有先渴而後患者有先患而後渴者皆腎

水涸不能制火故也初發而色黑者不治赤者水未涸尚可若失解其毒以致肉死色黑者急斬去之緩則黑延上足必死此患不同腫潰惟隔蒜灸有效亦有色作痛而自潰者元氣未脫易治夫至陰之下血氣難到毒易腐藥力又不易達况所用皆攻毒之藥未免先于腸胃又不能攻敵其毒不若隔蒜灸并割去最為良法故孫真人云在指則截在肉則割即此意也

一男子脚背患此赤腫作痛令隔蒜灸三十餘壯痛止以仙方活命飲四劑而潰以托裏消毒藥而愈

一男子足指患之色赤焮痛作渴隔蒜灸數壯服仙方活命飲三劑而潰更服托裏藥及加減八味丸潰脫而愈

一男子足指患之色黑不痛令明灸三十餘壯而痛喜飲食如常謂急割去之速服補劑彼不信延上遂致不救

一男子脚背患之色黯而不腫痛煩燥大渴尺脉大而
澹此精氣已絕不治後果然

楊太僕年逾四十左足大指赤腫焮痛此脾經積毒下
注而然乃脫疽也喜色赤而痛以人參敗毒散去人
參桔梗加銀花白芷大黃二劑更以瓜萸銀花甘草
節四劑頓退再以十宣散去桔梗加銀花防已數劑
而愈

一膏梁人年逾五十患此色紫黑脚焮痛孫真人云脫

疽之症急斬去之毒延腹必不治色黑不痛者亦不治喜其飲食如故動息自寧為瘡瘍善症也尚可治遂以連翹消毒散六劑更以銀花甘草節瓜萹二十餘劑患指潰脫再以芎歸地連翹銀花白芷二十餘劑而愈

一芻蕘左足指患一泡麻木色赤次日指黑五日足黑冷不知疼痛脉沉細此脾胃受毒所致以飛龍奪命丹一服翌日令割去足上死黑肉割後骨始痛可救

遂以十全大補湯治之而愈蓋死肉乃毒氣盛而拒
截營氣所致况至陰之下氣血難達經云風淫末疾
即此是也向若攻伐之則邪氣愈盛乘虛上侵必不救
海山驕淫益無度强并民居田宅婦女竟占山東之半
陸宣子者山東名醫也有富室妾足小指生瘡狀類
細米瘡頭早白根如熟棗臍挈挈欲墜聞平湖名
延之視曰此粟米瘡也與人面瘡等七日毒上升遍
體腐爛成黑水死矣君欲生之當急斷其指斷之愈

海山亦生是瘡屬宣子視宣子仍前言海山大怒欲
殺之楚人丁維章以外科有名出入禁內海山邀之
至告以宣子語且曰公視我瘡無恙吾必殺之維章
熟視曰殺我可也何尤宣子今已過三日毒上升矣
公欲活耶斷膝尚可海山瞑目曰其然三問應聲如
響海山喟然曰我命在公矣顧左右取截刀伸足曰
斷左右戰慄海怒罵使斷遂斷一腿維章手提海山
髮倚柱坐海山面黃氣絕維章曰可速召前醫者宣

子至視其地一腿尚自起跳躍黑血淋漓命取人參
一斤濃煎灌其口少頃海山甦顧其足曰嗟乎刑足
刑已重矣何辜而刑至膝幸公活我我自今後庶幾
可無後患閱四十九日而右膝毒發復生人面瘡醫
曰不可再治矣海山不數日死凡所奪民家產皆散
去其兄乃乞食如初

多骨疽

薛立齋治舉人于廷器腿患流注年餘出腐骨少許午

前畏寒午後發熱口乾唾痰小便頻數以為足三陰
虧損朝用補中益氣湯夕用六味地黃丸料加歸芪
五味各三十餘劑外用豆豉餅諸症漸愈又以十全
大補之類喜其慎疾而愈

一儒者患附骨疽失于調補瘡口不斂日出清膿少許
已而常出三腐骨其脉但數而無邪此氣血虛瘡結
膿管而不能愈繼以烏金膏日服十全大補而愈
上舍王廷璋患前症三年未愈肢體消瘦飲食難化手

足並冷大便不通手足陰冷此陽氣虛寒用補中益氣湯八味丸及灸其患處而愈

一男子臂患流注出腐骨三塊尚不斂發熱作渴脉浮大而濇乃氣血俱損須多服生氣血之劑庶可保全彼惑于火尚未盡仍用涼藥內服外敷幾危始求治其形甚瘁其脉愈虛先以六君子湯加芎歸日餘飲食漸進以八珍湯加肉桂三十餘劑瘡色乃赤更以十全大補湯外以附子餅灸之僅年而瘥醫林集要

云骨疽乃流注之敗症也如用涼藥則內傷其脾外
冰其血脾主肌肉脾氣受傷飲食必減肌肉不生血
為脉絡血受冰則氣血不旺而愈滯宜用理脾健脾
則肉自生而氣自運行矣又有白虎飛留連周期或
展轉數歲冷毒朽骨出盡自愈若附骨腐者可痊正
骨腐則為終身廢疾矣有毒自手足或頭面腫起或
兼疼痛上至頸項骨節去處如癆瘰貫珠此風濕流
氣之症也宜以加減小續命湯及獨活寄生湯治之

有兩膝腫痛起或至遍身骨節疼痛者此風濕痺又
名歷節風宜用附子八物湯治之又有結核在項腋
或兩乳傍或兩胯軟肉處名曰瘰癧癰屬冷症也又
有小兒宿痰失道致結核于頸項臂膊胸背之處亦
冷症也俱用熱藥敷貼已上諸症皆緣于腎腎主骨
堅虛則骨冷而為患也所謂骨疽皆起于腎亦以其
根于此也故用大附子以補腎氣腎實則骨有生氣
而疽不附骨矣

附骨疽

王肯堂治一人患附骨疽膿熟不能洩潰而入腹精神昏憤粥藥不入醫無所措診之脉細如蛛絲氣息奄奄曰無傷也用針刺其腹膿大洩然皆清稀若蟹吐沫在法為透膜不治用參芪附子加厥陰行經之藥大劑飲之又服八味丸食大進升餘肉數鬻旬日而平所可治者潰瘍之脉洪實者死微細者生病脉相合故可治也刺腹者膿不洩必內攻按之知其瘡深

即刺無害所以不透膜八味補腎腎氣旺而上升胃
口開而納食凡洩膿既多刀圭之藥其何能濟遷延
遲久且有他患故進開胃之藥多食肉以補之肌乃
速生此治潰瘍之大法

一男子腿根環跳穴患痛徹骨外皮如故脉數而滯滑
此附骨疽膿將成也用托裏藥六劑腫起作痛脉滑
數其膿已成針之出椀許更加補劑月餘而瘳

一男子患附骨疽腫硬發熱骨痛筋攣脉數而沉用當

歸拈痛湯而愈

張景岳治一人年三十餘素多勞忽患環跳酸痛數月
後大股漸腫曰此附骨疽也當速治與活命飲二帖
未效而腫益甚因混投清火解毒遂致嘔惡發熱飲
食不進勢甚危復求治與參芪內托散大加炮薑數
劑而嘔止食進其腫軟熟知其膿成針之膿不多復
與九味異功煎遂大潰且瓣瓣出膿潰者五六處腿
肉盡去止存皮骨矣潰後復嘔發熱不食以十全大

補湯九味異功散相間與之熱漸退食漸進然足筋短縮但可豎膝仰卧左右換緊毫不能動動則痛極自分已成廢人凡用十全大補三十餘劑人參三斤乃肉生筋舒如故

一人年近三旬素不節慾忽環跳穴酸痛月餘張曰此最可畏恐生癰毒不信或謂筋骨痛常事耳不過風熱使然與散風清火藥至半年後果微腫復求治曰速用托補以救根本尚不遲也又不信謀之瘍醫曰

豈有腫瘍未潰遽可溫補邪復用清火消毒之劑及
大潰而危再延視則脉症俱敗悔無及矣

一膏梁子年三旬素耽酒色亦患前症令早服藥執拗
不從及腫而膿成令速針之不肯偏信庸流敷以苦
寒解毒之藥不知膿已成猶何毒之可解但有愈久
愈深直待自潰元氣盡去不可收拾耳

立齋治地官孟御環跳穴患疽內服外敷皆敗毒寒劑
因痛極刺之膿瘀大瀉瘡口開張其色紫黯右關脉

浮大此胃氣復傷不能榮于患處也以豆豉餅六君子湯加藿香砂仁炮薑數劑由是胃氣醒而飲食進患處暖而肌肉漸生再以十全大補湯而愈

大尹都承慶患附骨疽內痛如錐外色不變勢不可消喜其未用寒劑止因痛傷胃氣而不思飲食用六君子湯治之飲食少進更以十全大補二十餘劑而膿成針去仍以大補湯倍用蒼芪歸朮加麥冬五味遠志貝母數服膿漸止而瘡亦愈

一儒者左腿微腫肉色如故飲食少思此真氣虛而濕邪內襲也蓋諸氣皆秉于胃法當助胃壯氣遂用六君加藿香木香當歸數劑飲食漸進更以十全大補元氣復而愈

一儒者兩腿腫痛肉色不變惡寒發熱飲食少思肢體倦怠脾氣不足濕痰下注也以補中益氣加半夏茯苓白芍二劑寒熱退而腫痛消又十餘劑脾胃壯而形體健

一男子因負重飲食失節胸間作痛誤認為瘡毒服大黃等藥右腿股腫肉色如故頭痛惡寒渴發熱脉洪大而無力此勞傷元氣藥損胃氣而然耳補中益氣湯四劑又用十全大補湯數劑喜其年少而愈

一婦人患附骨疽久而不斂致腿細短軟脉來遲緩以十全大補湯加牛膝杜仲及附子餅灸之兩月餘而愈凡膿潰之後脉瀋遲緩者易愈以其有胃氣故也

脉來細而沉時直者裏虛欲變症也若煩痛尚未痊

也洪實粗散者難療以其正氣虛而邪氣實也

一婦人環跳穴作痛肉色不變脉緊數此附骨疽也膿未成用內托黃芪酒煎湯加青皮龍膽草山梔數劑而消

一婦人患附骨疽久不愈膿水不絕皮膚瘙癢四肢痿軟以為虛欲補之彼惑為風疾遂服祛風藥竟致不起陳無擇云人身有皮毛血脉筋膜肌肉骨髓以成其形內則有心肝脾肺腎以主之若隨情妄用喜怒

勞佚致內藏精血虛耗使皮血筋骨肉痿弱無力以運動故致痿躄狀與柔風脚氣相類柔風脚氣皆外所因痿則內藏不足所致也


山西曹主簿年逾四十夏間患附骨疽服托裏藥而愈至秋飲食少思痰氣壅盛口舌生瘡用八味丸治之而愈

一老人腿患附骨疽腫硬大按方痛口乾脉弱腫聚不潰飲食少思謂腫下而堅者發于筋骨皮色不變者

發于骨髓遂以參芪等藥托之三十餘劑膿雖熟不穿謂藥力難達必須針刺不聽至旬日方刺之涌出清膿五六椀許然衰老之人氣血不足養毒又久竟不治大抵瘡疽旬日不退宜托之有膿刺之有腐肉取之虛則補之此十全之功也

王上舍患附骨疽畏針不開臂膝通潰脉數發渴煩躁時嗽飲食少思齊氏曰瘡瘍煩躁時嗽腹痛渴甚或瀉利無度此惡症也膿出之後若脉洪數難治微瀉

遲緩易治遂刺之膿出四五椀許即服大劑參朮歸
朮翌日脉稍斂更以八珍湯加五味麥冬肉桂白斂
三十餘劑脉緩膿稠三月而愈



續名醫類案卷五十四